

四庫全書

史部

欽定四庫全書

史部

水經注集釋訂訛卷四

詳校官監察御史_臣周元良

刑部郎中_臣許兆椿覆勘

總校官原任中允_臣王燕緒

校對官中書_臣吳裕德

謄錄監生_臣范墉

欽定四庫全書

水經注集釋訂訛卷三

歸安沈炳巽撰

河水三

河水又北過北地富平縣西

富平縣即今靈州所地

河側有兩山相對水出其間即上河峽

即今寧夏衛西南一百四

十里峽口山是明一統志云在衛西南一百四十里兩山相夾黃河經其中一名青銅峽上有古塔一百

八座世謂之青山河水歷峽北注枝分東出

河水又北逕富平縣西

今靈州所西南有富平縣故城

秦置北地都尉治縣城王莽名郡為威戎

按漢志作威戎一本

作威武

縣曰特武

漢志作持武

建武中曹鳳字仲理為北地

太守政化尤異黃龍應於九里谷高岡亭角長三丈

朱本作尺

大十圍稍至十餘丈天子嘉之賜帛百匹加秩

中二千石

河水又北逕薄骨律鎮城

城在河渚上赫連果城

錐指作果園

也桑果餘林仍列洲

上但語出戎方不究城名訪諸耆舊咸言故老宿彥
言赫連之世有駿馬死此取馬色以為邑號故目城
為白口騶韻之謬朱云韻字下當有轉字謂白口騶轉讀薄骨律耳遂仍今
稱所未詳也

錐指云薄骨鎮城在今蘭州所境唐朔方節度使
治所元和志靈州理迴樂縣本漢富平縣縣枕黃
河後魏刁雍為薄骨律鎮將上表請開富平西三
十里舊渠通河水溉公私田四萬餘頃人大獲其

利又薄律骨渠在縣南六十里溉田千餘頃靈武
縣東南至靈州十八里黃河自迴樂縣界流入漢
渠在縣南五十里從漢渠北流四十餘里始為千
金大陂其左右又有胡渠御史百家等八渠溉田
五百餘頃按五代唐長興中朔方帥張希崇亦引
河渠興屯田以省漕運民夷愛之今靈州所境田
多沃饒恒無暵涸之患賴黃河之灌溉也

河水又逕農城東

世謂之胡城又北逕上河城東世謂之漢城薛瓚曰

上河在西河富平縣即此也馮參為上河典農都尉

所治也

何氏云漢書馮參傳無典字蓋典農之名始于建安也續書百官志云邊郡置農都尉主

屯田
殖穀

河水又北逕典農城東

按錐指引此作又逕北典農城東二城皆上河典農都尉馮參

所治也在今
靈州所界

俗名謂之呂城皆參所屯以事農

朱校宋本農
下有一屯字

河水又東北逕廉縣故城東

廉縣漢屬北地郡其故城當在今靈州所西南

王莽之西河亭地理志曰卑移山在西北

河水又與北枝津合

水受大河東北逕富平城所在分裂以溉田圃北流入河今無水爾雅曰灇反入言河復決入者也河之有灇若漢之有潛也

河水又東北逕渾懷鄆西

地理志曰渾懷都尉治塞外者也太和初三齊平徙歷下民居此遂有歷地之名矣南去北城三百里

南去

北城恐誤漢志渾懷都尉在北地郡富平縣疑當作南去北地元和志懷遠縣在靈州東北隔河一百二十里廢靈武城在縣東北隔河一百里其城本蒙恬所築古謂之渾懷鄣

河水又東北厯石崖山西今在平羅所東

去北城城亦當作地五百里山石之上自然有文盡若戰

馬之狀粲然成著類以圖焉朱云當作頗似圖畫故亦謂之畫

石山也

又北過朔方臨戎縣西

河水東北逕三封縣故城東漢武帝元狩三年置十

三州志曰在臨戎縣西一百四十里

按漢志三封屬朔方郡其故城

在今榆林衛界廢夏州西南長澤縣北二十里

河水又北逕臨戎縣故城西

漢元年立

按漢志臨戎縣武帝元朔五年置今云漢元年誤

舊朔方郡治王

莽之所謂推武也

河水又北有枝渠東出謂之銅口東逕沃野故城南

和元

志沃野故城在天德軍城北六十里即後魏六鎮從西第一鎮也刀雍上表云臣鎮去沃野鎮八百里道多深

沙輕車往來猶以為難

漢武帝元狩三年立王莽之綏武也枝渠東注以溉
田所謂智通在我矣

河水又北屈而為南河出焉河水又北迤西溢於窳渾
縣故城東

漢武帝元朔二年開朔方郡治又有西部都尉治有
道自縣西北出雞鹿塞王莽更郡曰溝搜縣曰極武
其水積而為屠申澤澤東西一百二十里故地理志
曰屠申澤在縣東即是澤也關駟謂之渾澤矣屈從

縣北流

漢甘露三年董忠送韓邪單于出難底塞後漢永元初竇憲出難底塞伐匈奴是也窳渾

縣故城今在廢賓州西北

河水又屈而東流為北河逕高闕南

地理志曰朔方臨戎縣北有連山險

于長城其山中斷兩峯俱峻俗名為高闕也

史記趙武靈王既襲胡服自代並陰山下至高闕為

塞山下有長城長城之際連山刺天其山中斷兩岸

雙闕善能雲舉望若闕焉節狀表目故有高闕之名

也自闕北出荒中闕口有城跨山結局謂之高闕戍

上古迄今

朱箋云大事記注引此作我然雲舉節狀作即狀上古迄今作自古及今常置

重捍以防塞道漢元朔四年衛青將十萬人敗右賢

王於高闕即此處也

漢書匈奴傳元朔四年春漢遣衛青將六將軍十餘萬人出朔

方高闕右賢王以為漢兵不能至飲酒醉漢兵出塞六七百里夜圍右賢王右賢王大驚脫身逃走精騎往往隨後去漢將軍得右賢王人衆男女萬五千人裨小王十餘人河水又東逕臨河

縣故城北漢武帝元朔三年封代恭王子劉賢為侯

國王莽之監河也漢武帝元朔二年大將軍衛青絕

梓嶺梁北河是也

漢書衛青傳上曰車騎將軍青度西河至高闕絕梓嶺梁北河如淳

曰絕度也為北河作橋梁也按通典曰河經靈武郡西南便北流凡十餘里過九原郡乃東流漢人謂之西河自九原以東漢人謂之北河然北河之名秦已有之史記惠文王後五年遊北河昭襄王十八年又之上郡北至河目縣西河是也

河水自臨河縣東逕陽山南

臨河故城在今榆林衛西北

漢書注曰陽山在河北指此山也東流逕石跡阜西

是阜破石之文悉有鹿馬之跡故斯阜納稱焉南屈

逕河目縣西

西朱本作左董訥夫云疑在為左字之訛作左為是

北假地名也

自高闕以東夾山帶河陽山以去

謝云宋本作陽山以西

皆北

假也史記曰秦使蒙恬將十萬人北擊胡度河取高

闕據陽山北假中是也

史記注北假北方田官主以田假貧人故云北假應劭曰

北假在北地陽山北正義曰括地志云漢五原郡河目縣故城在北假中北假地名也在河北今屬勝州

銀城縣

北河又南合南河上承西河東逕臨戎縣故城

北又東逕臨河縣南又東逕廣牧縣故城北又

朱本作有

東部都尉治王莽之鹽官也逕流二百許里東會于

河

錐指云陽山即陰山也山在中國之極北故名陰

山水北曰陽山河水之北故亦謂之陽山徐廣云
陰山在河南陽山在河北非也漢書侯應曰北邊
塞至遼東外有陰山東西千餘里草木茂盛多禽
獸本冒頓依阻其中治作弓矢求出為寇是其苑
囿也孝武出師征伐斥奪此地攘之于漠北建塞
徼起亭隧築外城列屯戍以守之然後邊境得用
少安計陰山綿亘千餘里直抵遼東非河南所能
容益信徐說之謬王莽傳云五原北假膏壤殖穀

臨戎縣見前廣牧縣故城在今榆林衛地界

河水又南逕馬陰山西

史記音義曰五原安陽縣北有馬陰山

漢書音義曰陽山在河北陰山在河南謂是山也而即實不在河南史記音義曰五原安陽縣北有馬陰山今山在縣北言陰山在河南又傳疑之非也余按南河北河及安陽縣以南悉沙阜耳無他異山故廣志曰朔方郡北移沙七所而無山以擬之是議誌何改

志之僻也陰山在河東南則可矣

河水又東南逕朔方縣故城東

朱本下有北字

詩所謂城彼朔方也漢元朔二年大將軍衛青取河

南地為朔方郡使校尉蘇建築朔方城即此城也王

莽以為武符者也按地理志云金連青澤鹽澤並在

縣南矣

按漢書地理志朔方縣注金連鹽澤青鹽澤並在南今云青澤鹽澤恐誤

又按魏

土地記曰縣有大鹽池其鹽大而青白名曰青鹽又

名戎鹽入樂分漢志典官鹽池去平地

朱云平地疑作平城宮

千二百里在新秦之中服虔曰新秦地名在北方十

里如淳曰長安以北朔方以南也薛瓚曰秦逐匈奴
收河南地徙民以實之謂新秦也屈南過五原西安
陽縣南朔方縣故城漢朔方郡治元和志什貢故城
在夏州朔方縣東北即漢朔方縣之故城自
漢至今常為關中根植
什貢之號蓋番語也

河水自朔方東轉逕渠搜縣故城北

地理志曰朔方有渠搜縣中部都尉治王莽之溝搜

亭也禮三朝記曰北發渠搜南撫交趾此以北對南

禹貢之所云析支渠搜矣

朔方中部都尉治在廢夏
州北此非禹貢之渠搜說

見後

禹貢錐指云傳同叔云陸氏曰漢志朔方郡有渠
搜縣武紀云北伐渠搜是也以余考之漢朔方之
渠搜非此所謂渠搜此亦當是金城以西之戎也
後世種落遷徙故漢有居朔方者若禹時渠搜居
朔方則不應浮積石陸說非也渭按水經河水自
朔方東轉逕渠搜縣故城北注云禮三朝記曰北
發渠搜南撫交趾此以北對南禹貢之所云析支

渠搜矣誤始道元陸氏因之大戴禮漢武帝詔並
有三朝記語渠搜與交趾對舉則不在朔方可知
龜茲國王治去長安七千四百八十里而上郡有
龜茲縣師古曰龜茲國人來降附者處之於此故
以名云朔方之渠搜亦此類也周書王會篇曰渠
搜以鮑犬注云露犬也能飛食虎豹涼土異物志
曰古渠搜國在大宛北界隋書西域傳曰鎭汗國
都葱嶺之西五百餘里古渠搜國也渠搜之在西

域有明徵矣據漢書大宛北與康居接並在葱嶺西而異物志言渠搜在大宛北界豈漢時康居部落即古渠搜之地與或曰鑠汗在葱嶺之西以為渠搜母乃太遠曰奚有於是條支國臨西海去玉門陽關四萬里漢時猶且來獻今鑠汗國都去長安不過一萬二千二百五十餘里浮河而下至平陽則視長安又差近何言太遠也且後世德不足以及遠尚能威行萬里之外况舜禹之聲名洋溢

無遠弗屆者哉禹貢首崑崙次析支次渠搜蓋以入貢之序為先後也

河水又逕西安縣故城

按漢志五原郡有西安陽縣莽曰鄯安則此縣字當作陽

字

王莽更之曰鄯安矣

安陽故城在廢豐州東北

河水又東逕田

辟城南地理志曰故西部都尉治也屈東過九原縣

南

漢志五原郡成宜縣下云中郡都尉治原亭西部都尉治田辟辟讀曰壁原亭田辟蓋皆縣界之地

名

河水又東逕成宜縣故城南

城在廢豐州界

王莽更曰艾虜也

師古曰艾讀曰刈

河水又東逕原亭城南

關駟十三州志曰中部都尉治

河水又東逕宜梁縣之故城南

今在廢豐州東

關駟曰五原西南六十里今世謂之石崖城

河水又東逕柁陽城南

柁陽城即柁陽塞在柁陽縣西北後漢永元初竇憲出雞鹿塞

鄧鴻出柁陽塞即此城

東部都尉治逕河陰縣故城北

河陰屬漢五原郡

又東逕九

原縣故城南秦始皇置九原郡治此漢武帝元朔二年更名五原也王莽之獲降郡成平縣矣西北接對一城蓋五原縣之故城也王莽之填河亭也竹書紀年魏襄王十七年邯鄲命吏大夫奴遷于九原又命將軍大夫適子伐吏皆貂服矣

按今竹書紀年作適子伐吏皆貂服其

城南面長河北背連山秦始皇逐匈奴並河以東屬之陶山築亭鄣以為河上塞徐廣史記音義曰陶山在五原北即此山也始皇二十四年起自臨洮東暨

遼海西並陰山築長城及南越地晝警夜作民勞怨
苦故楊泉物理論曰秦始皇使蒙恬築長城死者相
屬民歌曰生男慎勿舉生女哺用哺不見長城下尸
骸相支柱其冤痛如此矣蒙恬臨死曰夫起臨洮屬
遼東城塹萬餘里不能不絕地脉此固當死也

又東過臨沃縣南

按臨沃屬五原
當在桐陽縣西

王莽之振武也

河水又東枝津出焉河水又東流石門水南注之

水出石門山地理志曰北出石門鄣即此山也西北
趣光祿城甘露三年呼韓邪單于還詔遣長樂衛尉
高昌侯董忠車騎都尉韓昌等將萬六千騎送單于
居幕南堡光祿徐自為所築城也故城得其名矣城
東北即懷朔鎮城也其水自障東南流逕臨沃城東
東南注于河

河水又東逕桐陽縣故城南

王莽之固陰也地理志曰自縣北出石門障河水決

其西南隅又東南枝津出焉水上承大河於臨沃縣

東流七十里北溉田南北二十里注于河

五原郡東部都尉治

在今榆林衛廢勝州西南漢志桐陽縣北出石門障得光祿城太初三年光祿徐自為出五原塞築亭障西北至盧朐山謂之光祿塞即此按中受降城本泰九原郡地唐置天德軍元和志云武川城在軍北三百里後魏六鎮從西第三鎮也自北出石門障即光祿城古入匈奴之大路

河水又東逕塞泉城南而東注又東過雲中楨陵縣南

又東過沙南縣北從縣東屈南過沙陵縣西

塞泉城在今廢勝州

界

大河東逕成陽縣故城南王莽之賁武也

河水屈而

下疑漏東
西等字

流白渠水注之

水在塞外西逕定襄武進縣故城北西部都尉治王莽更曰伐蠻世祖建武中封趙慮為侯國也白渠水西北逕成樂北郡國志曰成樂故屬定襄也魏土地記曰雲中城東八十里有成樂城今雲中郡治一名石盧城也白渠水又西逕魏雲中宮南魏土地記曰雲中宮在雲中故城東四十里白渠水又西南逕雲

中故城南故趙地虞氏記云趙侯自五源河曲築長城東至陰山又於河西造大城一箱崩不就乃改卜

陰山河曲而禱焉晝見羣鵠遊於雲中徘徊經日見

大

一作大

光在其下武侯曰此為我乎乃即于其處築

城今雲中城是也秦始皇十三年立雲中郡縣曰遠

服矣

按漢志雲中縣注莽曰遠服則縣字疑當作莽字

白渠水又西北逕沙

陵縣故城南王莽之希恩縣也其水西注沙陵湖又

有芒湖水

朱本作芒于水

出塞外南逕鍾山山即陰山故即

中侯應言於漢曰陰山東西十餘里單于之苑囿也
自孝武出師攘之于漠北匈奴失陰山過之未嘗不
哭謂此山也其水西南逕武臯縣王莽之永武也又
南逕原陽縣故城西又西南與武泉水合其水東出
武泉縣之故城西南縣即王莽之所謂順泉者也水
南流又西屈逕北興縣故城南按地理志曰五原有
南興縣王莽之南利也故此加北舊中部都尉治十
三州志曰廣陵有興故此加北疑太疎遠也

按今本漢書地

理志五原郡有南興縣莽曰南利而無南興其水又
酈注作南興豈古本是興而後人譌作興耶

西南入芒于水西南逕白道南谷口有長城在右策

朱本作側然谷口帶長城背山面澤謂之白道南谷
二句疑尚有譌脫

口有城自城北出有高坂謂之白道嶺公路惟土穴

出泉挹之不窮余每讀琴操

此下疑有譌誤恐不接此

見琴慎相

和雅歌錄云飲馬長城窟及其扳陟斯途遠懷古事

始知信矣非虛言也顧瞻左右山樹

朱本注謝兆申云宋鈔本作山

椒之上有垣若頽基焉汾溪亘嶺東西無極疑趙武

靈王之所築也芒于水又南西逕雲中城北白道中
溪水注之水發源武川北塞中具水南流逕武川鎮
城以景明中築以禦北狄矣其水西南流厯谷逕魏
帝行宮東世謂之阿計頭殿宮城在北門嶺北阜上
其城員角而不方四門列觀城內惟臺殿而已其水
又西南厯中谿出山西南流於雲中城北於雲中城
北五字疑衍南注芒于水芒于水又西下有謠誤塞水出懷朔
鎮東北芒中南流逕廣德殿西山下余以太和十八

年從高祖北巡居於陰山之講武臺臺之東有高祖
講武碑碑文是中書郎高聰之辭也自臺西出南上
山山無樹木惟童阜耳即廣德殿之所在也其殿四
柱兩厦堂宇綺拱圖畫奇禽異獸之象殿之西北便
得焜煌堂雕盈鏤角取狀古之溫室也其時帝幸龍
荒遊鸞朔北南秦王仇池楊難當捨蕃委誠重譯拜
闕陛見之所也故殿以廣德為名魏太平真君三年
刻石樹碑勤宣時事碑頌云肅清帝道振攝四荒有

蠻有戎自彼氏羌無思不服重譯稽顙恂恂南秦歛
歛推亡戮戮廣德奕奕焜煌侍中司徒東郡公崔浩
之辭也碑陰題宣成公李孝伯尚書盧遐等從臣姓
名若新鏤焉其水厯谷南出陰山西南入芒于水芒
于水又西南注沙陵湖湖水西南入于河

河水南入楨陵縣西北

緣胡山

上下疑有譌誤或連上經文俱是注

厯沙南縣東北兩山二縣

之間南出余以太和中為尚書郎從高祖北巡親所

遼涉縣在山南王莽之楨陸也北去雲中城一百二十里縣南六十許里有東西大山山西枕河河水南流脉水尋經殊乖川去之次似非關究也

錐指云緣胡山在今平虜衛西北黃河西來折而南流處楨陵即廢東勝州也其故城在衛西北河東岸沙南故城在西岸榆林塞外唐為勝州地經文當云又南遼雲中楨陵縣西又南遼沙南縣東則與道元所見者符矣

又南過赤城東又南過定襄桐過縣西

定襄郡漢高六年置王莽之得降也桐過縣王莽更名椅桐者也

河水於二縣之間濟有君子之名

今山西平虜衛西有君子濟此條疑是

注

昔漢桓帝十三年西幸榆中東行代地洛陽大賈賸

金貨隨帝後行夜迷失道往投津長曰子封

朱云御覽引此

無曰子封三字疑當作田子封是津長姓名

送之渡河賈人卒死津長埋

之其子尋求父喪發冢舉尸資費一無所損其子悉以金與之津長不受事聞於帝

朱云御覽有兩帝字

曰君子也

即名其津為君子濟濟在雲中城西二百餘里

河水又東南左合一水

水出契吳東山西逕故里南而北俗謂之契吳亭其

水又西流注于河

河水又南樹頽水注之

水出東山西南流右合中陵川水水出中陵縣

縣下黃本

闕一字吳本補作東字
謝兆申云宋本作西字
東南山下北俗謂之大浴山

其水亦取名焉東北流逕中陵縣故城東北俗謂之
北右突城王莽之遮害也十三州志曰善無縣南七
十五里有中陵縣世祖建武二十五年置其水又西
北右合一水水出東山北俗謂之貸敢山水又受名
焉其山自西北流注于中陵水又西北流逕善無縣
故城西王莽之陰館也十三州志曰舊定襄郡治地
理志曰雁門郡治其水又西北流又會一水水出東

山下北俗謂之吐文水山又取名焉北流逕鋤亭南
西流土壁亭南西出峽左入中陵水水又北分為二
水一水東北流謂之流水又東逕沃陽縣坎城南

坎城

當作故城

北俗謂之可不塋城王莽之敬陽也又東北逕

沃陽城東又東合可不塋水出東南六十里山下西

北流注沃水又會東逕叅合縣南

會字疑衍

魏因叅合逕

以即名也北俗謂之倉鶴逕道出其中亦謂之叅合

口逕在縣之西北

朱本作逕左縣之西北愚意當是逕在縣之西北

即燕書

所謂太子寶自河還師叅合三軍奔潰即是處也魏立縣以隸涼城郡也西去沃陽縣故城二十里縣北十里有都尉城地理志曰沃陽縣西部都尉治者也北俗謂之阿養城

沃陽衛在今平鹵衛東南

其水又東合一水水

出縣東南六十里山下北俗謂之災豆渾水西北流注于沃水又東北流注鹽池地理志曰鹽澤在東北者也今鹽池西南去沃陽故城六十五里池水澄渟淵而不流東西三十里南北二十里池北七里即涼

城郡注

疑作治

池西有舊城俗謂之涼城也郡取名焉

地理志曰澤有丞長

朱云漢書地理志沃陽下注云鹽澤在東北有長丞則此丞長

當作長丞

此丞即長丞所治也城西三里有小阜阜下有

泉東南流注池北俗謂之大谷此佳

疑當作此阜

水亦受

目焉中陵川水自枝津西北流右合一水于連嶺北

出沃陽縣東北山下北俗名之烏伏真山水曰誥升

袁河

朱云當作緣河愚謂當作袁水

西南流逕沃陽縣左合中陵川

亂流西南與一水合北俗謂之樹頽水水出東山下

西南流右合誥升袁水亂流西南注分為二水左水

枝分南出北俗謂之太河羅

朱本云太河羅當作太羅河

右水西

逕故城南北俗名之昆新城其水自城西南流注于河

河水又南太羅水注之

水源上承樹頽河南流西轉逕武縣

當是武州縣

故城南

武縣故城在今繁峙縣界

十三州志曰武縣在善無西百五十里

北俗謂之太羅城水亦藉稱焉其水西南流右水注

之水導故城西北五十里南流逕城西北名之曰故

槃迴城又南流注太羅河太羅河又西南流注于河

河水又左得滴水口

平虜衛西有呂梁山滴水口當在今河曲縣西北天橋峽也

水出西河郡美稷縣東南流東觀記曰郭伋細侯

郭伋

下疑脫字字

為并州牧前在州素有恩德老小相携道路

行部到西河美稷數百小兒各騎竹馬迎拜伋問兒

曹何自遠來曰聞使君到喜故迎伋謝而發去諸兒

復送郭外問使君何日還伋計日告之及還先期一

日念小兒即止野亭須期至乃往其水又東南流羌人因水以氏之漢冲帝時羌湍狐奴歸化蓋其渠帥也其水俗亦謂之湍波水東南流入長城東鹹水出長城西鹹谷東入湍水又東逕西河富昌縣故城南王莽之富城也湍水又東流入于湍水左合一水出善無縣故城西南八十里其水西流厯于呂梁之山而為呂梁洪其巖層岫衍澗曲崖深巨石崇竦壁立千仞河流激盪濤湧波襄雷奔雲洩震天動地曰呂

梁未闢河出孟門之上蓋大禹所闢以通河也司馬

彪曰呂梁在離石縣西今於縣西歷山尋河乃無過

峽

朱云當作過岨

至是乃為河之巨嶮即呂梁矣在離石北

以東可二百有餘里也

一本無也字

又南過西河圖

音銀

陽縣東

輿地廣記

唐立銀州

東北有

無定河

即圖水也

後人因潰

沙急流深淺不定故更今名

明一統志無定河一名奢延水又名圖水

西河郡漢武帝元朔四年置王莽改曰歸新圖水出

上郡白土縣圖谷東逕其縣南地理志曰圖水出其

西東入河王莽更曰黃土也東至長城與神街

朱本作神

御下同

水合水出縣南街山峽山東出至長城入于囿

園水又東逕鴻門縣縣故鴻門亭地理風俗記曰囿

陰縣西五十里有鴻門亭天封苑火井廟火從地中

出

按漢志云鴻門有天封苑火井祠火從地出則

囿

水又東梁水注之水出西北梁谷東南流注囿水又

東逕囿陰縣北漢惠帝五年立王莽改曰方陰矣又

東桑谷水注之水出西北桑溪東北桑谿

東北桑谿四字疑衍

東北流入于圉圉水又東逕圉縣南東流注于河

按禹

貢錐指引此作又東逕圉陽縣南又東注于河云今米脂縣西北有圉陰縣故城圉陽當在其東北也史記晉文公攘戎翟居于圉洛之間即此水

河水又東端水入焉

水西出號山山海經曰其山木多陁櫟

按山海經當作漆櫟

其

草多芎窮是多冷石

朱云按山海經作冷石郭註音金今云冷石未詳

端水

出焉而注于河

河水又南諸次之水出焉

水出上郡諸次山山海經曰諸次之山諸次水出

孫云

山海經作諸次之山諸次之水出焉

是山多木無草鳥獸莫居是多衆

蛇其水東逕榆林塞世又謂之榆林山即漢書所謂

榆溪舊塞者也

上郡即今陝西延安府綏德州榆林塞在廢勝州南界

自溪西

去悉榆林

黃作柳朱作林

之數矣緣厯沙陵屆龜茲縣西出

故謂廣長榆也王恢云樹榆為塞謂此矣蘓林以為

榆中在上郡非也按始皇本紀西北逐匈奴自榆中

並河以東屬之陰山然榆中在金城東五十許里陰

山在朔方東以此推之不得在上郡漢書音義蘇林

為是非也其水東入長城小榆林水合焉厯澗

朱本作厯

源

西北窮谷其源也又東合首積水西出首積溪

東注諸次水又東入于河山海經曰諸次之水東流注于河即此水也

河水又南湯水注之

山海經曰水出上申之山上無草木而多砢石

郭注作砢

砢石貌也砢音洛

下多榛櫟湯水出焉東流注于河

又南

雖指引此南
下有涇字

離石縣西奢延水注之

離石縣今永
寧州奢延故

城在廢夏
州西南

水西出奢延縣西南赤沙阜東北流山海經曰

曰字
疑衍

所謂生水出孟山者也郭景純曰孟或音明漢破羌

將軍段熲破羌於奢延澤虜走洛川洛川在南俗因

縣土謂之奢延水又謂之朔水矣東北流逕其縣故

城南王莽之奢節也赫連龍昇七年

按十六國春秋
赫連無龍昇七

年其年改
元鳳翔

于是水之北黑水之南遣將作大匠梁公

叱于阿梨

按夏錄作叱于阿利

改築大城名曰統萬城蒸土加

功雉堞雖久崇墉若新并造五兵器銳精利乃成百

鍊為龍雀大環號曰大夏龍雀銘其背曰古之利器

吳楚湛盧大夏龍雀名冠神都可以懷遠可以柔逋

夏錄作柔逋

如風靡草咸服九區

夏錄作九域

世甚珍之又鑄

銅為大鼓及飛廉翁仲銅駝龍虎皆以黃金飾之列

于宮殿之前則今夏州治也

夏錄較詳附錄于後

十六國春秋夏錄曰鳳翔元年春三月大赦境內

殊死以下改元鳳翔以叱干阿利領將作大匠發
嶺北夷夏十萬餘戶改築都城于朔方水之北黑
水之南名曰統萬城下書曰古人制起城邑或因
山水或以義立名今城已建萬堵斯作克成弗遠
宜有美名朕方統一天下君臨萬邦可以統萬為
名阿利性尤工巧然殘忍刻暴視民如草芥乃蒸
土加功以錐刺之錐入一寸即殺作人而并築之
刺之不入即殺行錐者勃勃以為忠故委以營繕

之任又使造五兵器銳利尤甚乃成百鍊既成呈
之工匠必有死者射甲不入即斬弓人如其入也
則斬鎧匠又造百鍊剛刀五口背上為龍雀大環
兼以金縷作一龍形長三尺九寸號曰大夏龍雀
銘其背曰古之利器吳楚湛盧大夏龍雀名冠神
都可以懷遠可以柔邇如風靡草威服九域世甚
珍之復鑄銅為一大鼓及飛廉翁仲銅駝龍虎之
形皆以黃金飾之列於宮殿之前凡殺工匠數千

餘人以此器物莫不精麗

奢延水又東北與溫泉合源而北出沙溪而東南流

注奢延水奢延水又東黑水入焉出奢延縣黑澗

按朱

云當作奢延水又東與黑水合黑水出奢延縣黑澗謝云按宋本黑水入焉水出奢延縣黑澗宋刻本無

焉水東南歷沙陵注奢延水奢延水又東合交蘭水

二字

出龜茲交蘭谷東南流注奢延水奢延水又東北流

與鏡波水合水源出南祁山南谷東北流注于奢延

水奢延水又東逕膚施縣帝原水西北出龜茲縣東

南流縣因處龜茲降胡著稱又東南注奢延水又逕
膚施縣南秦昭王三年置上郡治漢高祖并三秦復
以為郡王莽以漢馬員為增山連率歸世祖以為上
郡太守司馬彪曰增山者上郡之別名也東入五龍
山地理志曰縣有五龍山帝原水自下亦為通稱也

按漢地志上郡膚施縣有五龍山帝源水陽
周縣橋山有黃帝塚而西河自有增山縣 歷長城

東出于赤翟白翟之中又有年水

宋本作平水

出西北平

谿東南入奢延水又東走馬水注之水止

疑誤當作出

西

南長城北陽周縣故城南昔二世賜蒙恬死于此王莽更名上陵時山上有黃帝塚故也帝崩惟弓劍存焉故世稱黃帝仙矣其水東流昔段熲追羌出橋門至走馬水聞羌在奢延澤即此處也門即橋山之長城門也始皇令太子扶蘇與蒙恬築長城起于臨洮至于碣石即是城也其水東北流入長城又東北注奢延水又東與白羊水合其水出于西南白羊溪逡溪東北注于奢延水奢延又東入于河山海經曰生

水東流注于河

河水又南陵水注之

水出陵川北溪南逕其川西轉入河

河水又南得離石水口

離石

何云離石上當有水出二字

北山南流逕離石縣故城西史

記云秦昭王伐趙取離石者也漢武帝元朔三年封

代共王子劉歸

按史記表當是劉綰

為侯國後漢西河郡治也

其水又逕隰城故城南

隰城故城在今孝義縣界

漢武帝元朔三

年封代共王子忠為侯國王莽之茲平亭也

按漢志莽曰慈

平胡俗語訛尚有千城

何云千疑作平

之稱其水西流注于

河也

又南過中陽縣西

中陽縣即今孝義縣界

中南

疑是陽

縣故城在東東翼汾水隔越重山不瀆于

河也

又南過土軍縣西

今山西汾州石樓縣有土軍縣故城

吐京郡治故城即土軍縣之故城也胡漢譯言音訛

偽變矣其城員長而不方漢高帝十一年以封武侯
宣義為侯國縣有龍泉出城東南道左山下牧馬川
上多產名駒駿同滇池元朱云下河其水西北流
至其城東南土軍水出道左高山西南注之龍泉水
又北屈還其城東西北入于河

河水又南合契水

傍溪東入窮谷其源也又南至祿谷水口水源東窮
此溪也

河水又南得大蛇水

發源溪首西流入河

河水又右納辱水

朱本作又南
又納辱水

山海經曰辱水出于鳥山其上多桑其下多楮陰多

鐵陽多玉其水東流注于河俗謂之秀延水東流得

浣水合傍溪西轉窮溪便即浣水之源也延水又東

會于根水西流溪下根水所發而東北注延水東南

露跳水西出露溪東流又東北入延水亂流注于河

河水又南左合信支水水發源東露西流入于河
水又南左會石羊水逕溪東入道源窮谷西流注于
河

又南過上郡高奴縣東

今延安府膚施縣北百里
有金明城即漢高奴縣也

城谷水東啟荒源西厯長谿西南入于河水又南合
溪口北出孔山南厯溪西流注于河孔山之上
有穴如車輪三所東西相當相去各二丈許南北直通故
謂之孔山也山在蒲城

朱本云蒲城
當作蒲城

西南三十餘里

河水又右會區水山海經曰次四經之首曰陰山西

北百七十里曰申山其上多穀柞其下多柎櫟

按山海經

此下脫其陽二字

多金玉區水出焉而東流注于河世謂之

清水上郡東流入于長城遼老人山下又東北流至
老人谷傍水北出極溪便得水源清水又東得龍尾
水口水出北地神泉鄯北山龍尾溪東北注清水又
東會三湖水水出南山三湖谷東北流入清水清水
又東遼高奴縣合豐林水地理志謂之洧水也故言

高奴縣有洧水肥可難

難古燃字黃本譌作醃

水上有肥可接

取用之博物志稱酒泉延壽縣南山出泉水大如莒

注地為溝水有肥如肉汁取著器中始黃後黑如凝

膏然極明與膏無異膏車及水碓缸甚佳彼方人謂

之石漆水肥亦所在有之非止高奴縣洧水也項羽

以封董翳為翟王居之三秦此其一也漢高祖破以

縣之王莽之利平矣民俗語訛謂之高樓城也豐林

川長津瀉注北流會洧洧水又

下疑漏東西等字

有谿谷水

注之水西出奚川東南流入洧水又東注于河

河水又南

疑脫
逕字

蒲川石樓山南逕蒲城東

即重耳所奔之處也又南歷蒲子縣故城西今大魏

之汾州治徐廣晉紀稱劉淵自離石南移蒲子者也

關駟曰蒲城在西北漢武

下漏
帝字

置

按漢志河東郡蒲
子縣注應劭曰武

帝置師古曰重耳所居也又蒲反縣下注
莽曰蒲城朱本引應劭云即蒲反舊邑

其水南出

得黃盧水口東出歷蒲子城南東北入谷極溪便水

之源也又南合紫川水水出東北出

疑作
山

紫川谷西

南合江水江水出江谷西北入紫水紫水又西北入蒲水蒲水又西南入于河水河水入南黑水水出定陽縣西山二源竒發同瀉一壑東南流逕其縣北又東南流右合定水俗謂之白水也水西出其縣南山定水谷更逕定陽縣故城南應劭曰縣在定水之陽也定水又東注于黑水亂流東南入于河

蒲子縣故城今在隰

州

水經注集釋訂訛卷三

欽定四庫全書

水經注集釋訂訛卷四

歸安沈炳堃撰

河水四

河水又南過河東北屈縣西

今吉州北二十里有北屈縣故城

河水南逕北屈縣故城西十里有風山上有穴如輪

風氣蕭瑟習常不止

明統志山西平陽府吉州北三十里有風山

當其衝

飄也而略無生草蓋不定

朱箋云事類賦引此作當其衝所略無生草御覽引

此作蓋 衆風之門故也風山西四十里河南孟門山

明統志孟門山在 吉州西七十里 山海經曰孟門之山其上多金玉

今本山海 經作蒼玉 其下多黃堊湟石淮南子曰龍門未闢呂

梁未鑿河出孟門之上大溢逆流無有丘陵高阜滅
之名曰洪水大禹疎通謂之孟門故穆天子傳曰北

登孟門九河之蹬 按穆天子傳云北升于盟門九河之蹬玉篇曰隘險阪也或作蹬

孟門即龍門之上口也實為黃河之巨阨兼孟津之

名矣此石經始禹鑿河中漱廣夾岸崇深傾崖返捍

巨石臨危若墜復倚古之人有言水非石鑿而能入
石信哉其中水流交衝素氣雲浮往來遙觀者常若
霧露沾人窺深悸魂其水尚崩浪萬尋縣流千丈渾
洪鼎怒鼓若山騰濤波頽疊迄于下口方知慎子下
龍門流浮竹非駟馬之追也朱本引慎子云河下龍
門其流駛竹箭駟馬追
之不
及又有燕完水注之異源合舍西流注河

河水又南得鯉魚

下疑有
脫字

厯澗東入窮溪首便其源也爾雅曰鱣鮪也出鞏穴

三月則上渡龍門得渡為龍矣否則點額而還非夫
往還之會何能便有茲稱乎

河水又南羊求水入焉

東出羊求川西還北屈縣故城南城則夷吾所奔邑
也王莽之朕北也汲郡古文曰翟章救鄭次於南屈
應劭曰有南故加北國語曰二五言于獻公曰蒲與
二屈君之疆也其水西流注于河

河水又南為採桑津

春秋僖公八年晉里克敗狄于採桑是也

又南過皮氏縣西

今平陽府河津縣
西有皮氏縣故城

赤水出西北罷谷川東謂之赤石川東入于河

河水又南合蒲水

西則兩源並發俱道一山出西河陰山縣王莽之山

寧也

陰山縣今
平陽府界

陰山東麓南水東北與長松水合水

出西三陽山東東北流左入蒲水蒲水又東北與北

溪會同為一川東北注河

河水又南逕丹水西南

丹陽山東北逕冶東俗謂之丹陽城城之左右猶有

遺銅矣

何氏云漢書地理志丹陽郡有銅官食貨志注中赤金丹楊銅者即指此道元誤以是山

當之耳其水東北會白水口水出丹山東而西北注之

丹水又東北入河

河水又南黑水

朱本此下有注之二字

西出丹山東而東北入于河

河水又南至嶠谷傍

東北窮澗水源所導也西南流注于河

河水又南洛水自獵山枝分東派東南注于河

一作大河

昔魏文侯築館洛陰指謂是水也皮氏縣王莽之延平也故城在龍門東南不得延逕皮氏方屈龍門也

禹貢錐指曰以今輿地言之河自大積石山東北流逕陝西西寧衛西南塞外至河州西七十里入

塞

衛在行都司東南七百餘里黃河西自塞外流入經衛之東南與河州分水州在臨洮府西一

百八十里西至生番界七十里有小積石山兩岸如削河流其中西南去大積石山千餘里又

東北逕州北合灘水又東北合洮水

二水已見上文

又東

北逕蘭州西南湟水合浩疊水自西來注之

州在臨洮

府北二百十里黃河去州二里閼駟所謂金城河也湟水自州西一百八十里入河唐書吐蕃傳湟水出蒙古抵龍泉與河合河之上流由洪濟梁西南行二十里世舉謂西戎地曰河湟

又東

北逕州北

夾河有灘宜播五穀引水灌溉甚為民利

又東北逕金縣北

縣在蘭州東九十里黃河去縣六十里

又東北逕靖遠衛北

舊名靖虜屬陝

西都司本漢鸛陰縣地後漢建初中趙冲追擊叛羌于鸛陰河即此衛北有韋精山黃河自金縣亂山中來至衛西南百里烏蘭關漢祖厲縣地也唐置烏蘭縣屬會州有黃河堰刺史安敬忠所築以

捍河又東北逕寧夏中衛南衛屬陝西都司黃河去衛十五里地勢稍

平河流益威衛東南一百五十里有鳴沙城西又枕黃河人馬行經此沙隨路有聲故號鳴沙

東北逕靈州所北所在寧夏衛少西九十里本漢靈州富平二縣地舊志云黃河

千里一曲自澆河至故昫卷縣率東北流至富平始曲而北流亦謂之河曲云折而北逕

寧夏衛東南衛屬陝西都司宋為懷遠鎮李德明城此為興州以居景祐中元昊升為

興慶府衛西至賀蘭山邊界六十里北至鎮遠關邊界二百里東至榆林衛界三百五十里黃河去

衛四十里元和志保靜縣西南至靈州六十里本漢富平縣地賀蘭山在縣西五十三里東望雲山

形勢相接迤邐向北經靈武縣又西北經保靜縣西又北逕懷遠縣西又北逕定遠城西又東北抵

河其抵河之處亦名乞伏山在黃河西從首至尾有象月形南北約長五百餘里正邊城之巨防山之東河之西有平田數千頃可引水灌溉如盡收地利足以贍給軍儲也顧景范云自寧夏以上民多穿渠溉田而寧夏之利尤博蓋上流勢少又北緩無溢決之患且泥沙未甚故引河為宜也

逕平羅所東

舊名平虜在寧夏衛東北一百二十里河去所十五里賀蘭山在所西六十

十里鎮遠關在所北六十里

又北逕榆林衛西出塞逕廢豐州

西

衛本漢上郡龜茲縣地金元為米脂縣地名榆林莊明正統二年築榆林城天順七年置榆林

衛治焉北至邊牆十里其外皆戰國時雲中九原地也黃河自靈州所橫城堡西折而北逕寧夏平

羅入衛界廢豐州城在衛西北塞外七百里本漢朔方郡之廣牧縣後魏為懷朔鎮隋始置豐州治

九原縣明初廢杜佑曰豐州西至黃河百三十里北至黃河四十里東北至黃河八十里折而

東逕三受降城南

元和志三受降城景雲三年朔方總管張仁愿所置也先是朔

方軍北與突厥以河為界河北岸有拂雲堆神祠突厥將入寇必先詣祠祭祈求福因牧馬料兵而後渡河時突厥默啞盡衆西擊突騎施婆葛仁愿奏請乘虛奪取漢南地於河北築三受降城首尾相應絕其南寇之路從之六旬而三城俱就以拂雲祠為中城與東西兩城相去各四百餘里遙相應接北拓三百餘里於牛頭牟那山北置烽堠一十八百所自是突厥不得度山放牧朔方無復寇掠減鎮兵數萬人顧景范云中城在廢夏州北八百里西城在廢豐州北八十里東城在廢勝州東二百里今按東城本漢定襄郡之盛樂縣後魏嘗都此唐置振武軍元和六年以韓重華為振武營

田和糴水陸運使重華請募人為十五屯置百
三十人而種百頃令各就高為堡東起振武轉而
西過雲中界極于中受降城出入河山之際六百
餘里屯堡相望寇來亦不能為暴人得肆耕其中
少可以罷漕輓之費朝廷從其議秋果倍收歲折
省度支錢十三百萬見韓愈送重華歸所治序折

而南遼廢勝州東入塞其東岸則平虜衛廢勝州城在榆

林衛東北四百五十里本漢雲中五原二郡地隋
置勝州治榆林縣元和志云北近榆林即漢之榆

林塞雲中故郡在縣東北四十里東受降城在縣
東北八里榆林關在縣關三十里東北臨河自夏

州朔方縣流入又遼河濱縣十五步濶一里不通
船楫即河濱關渡處名君子津杜佑曰勝州東至

黃河四十里北至黃河五里西北至黃河二十里
平虜衛在山西大同府西少南二百四十里明置

本漢雁門郡之武州縣隋唐以後為朔州地元和志黃河朔州鄯陽縣西三百里遼自河西移置勝州于此曰東勝州其故城在今衛西北元和志唐徙東受降城于綏遠烽南即今州治也明洪武初改建左右二衛兵民皆耕河套中寇益稀少二十六年城東勝永樂初移就延綏其地遂墟今按自廢豐州東至廢勝州西黃河三面圍繞之地週數千里謂之河套周曰朔方秦曰新秦漢為朔方郡地隋唐為豐勝二州地明為榆林衛北境自其初舍受降而衛東勝已失二面之險其後又撤東勝以就延綏則外險盡失寇來莫禦天順六年元裔摩囉歡阿拉善博囉齊三部始入居河套屢為邊患隆慶中濟囊以諸達內附亦來款塞因而羈縻之本朝屬理藩院榆林新志曰河套之地南抵邊牆北瀕黃河遠者八九百里近者亦一二百里惟黃甫川之南焦家坪及娘娘灘羊圈渡口為最

近又南逕府谷縣東其東岸則河曲縣保德州府

在陝西葭州東少北三百四十里黃河南流逕黃甫川九里入縣界又南逕縣東去縣百步河曲在

山西太原府西北五百二十八里黃河在縣西北府志云自縣東北故東勝州境轉而西南流八十

里至縣西北平泉村復轉西流九十里至天橋峽又南流入保德州界偏頭關在縣東北一百十里

東接鴉角山西逼黃河其地東仰西伏因名偏頭保德在府西北五百里黃河在州西北一里

西逕神木縣南又南逕葭州東其東岸則興縣神木

在葭州東北一百二十里黃河去縣十里葭州在延安府東北五百八十里黃河去州一里興縣在

太原府岢嵐州西一百五十里黃河在縣西五十里元和志嵐州合河縣黃河在縣西二里按今興

縣西北五十里有合河故城舊志云山西自河曲至蒲津千五百里俱鄰陝西河最狹而于神木渡河為
又南逕吳堡縣東又南逕綏德州東其東岸

則臨縣永寧州寧鄉縣

吳堡在葭州南八十里黃河去縣一里綏德在延安

府東北三百六十里黃河去州一百二十里無定河在州城東即古者延水以潰沙急流深淺不定故名臨縣在山西汾州府西北三里黃河在縣西八十里永寧州在府西北一百二十里寧鄉在州西南五十里黃河並在其西元和志石州平夷縣黃河西去縣一百四十五里定胡縣黃河去縣西二百步按平夷故城即今寧鄉縣治定胡當在永寧州界永寧本石州明隆慶三年更名又

南逕清澗縣東又南逕延川縣東又南逕延長縣

東其東岸則石樓縣永和縣大寧縣

清澗在延安府東北二百

里黃河去縣四十五里延長在府東少南百五十里黃河去縣三十五里元和志延州延水縣黃河

在縣東八里門山縣黃河去縣三十五里按延水故城在今府東北一百十里門山故城在府東南

一百八十里石樓在汾州府西少南二百六十里黃河在縣西九十里永和在山西平陽府隰州西

九十里黃河在縣西六十里大寧在州西南九十五里黃河在縣西六十八里孟門山在縣西南八

十里與吉州分山

又南逕宜川縣東其東岸則吉州鄉寧

縣宜川在延安府東南二百八十里黃河去縣八十里元和志丹州汾川縣西南至州七十里黃

河在縣北七里河岸頓狹狀如槽形鄉人呼為石槽蓋禹治水鑿石導河之處石槽長千步澗三十

步懸水奔流龍黿魚鼈所不能遊按汾州故城在今宜川縣東七十里孟門山在縣東南二十里黃河西岸山勢綿延與吉州孟門山參差相接即文城故縣西南三十六里河中之石槽也吉州在平陽府二百四十里黃河在州西六十里壺口山在州西南七十里鄉寧縣在州東南六十里黃河在縣西七里又南至韓城縣東北龍門山在焉其東岸則河津縣韓城在西安府同州東北二百里黃河去縣十五里龍門山在縣北五十里河津在平陽府蒲州東北二百里黃河在縣西元和志云去縣二十五里即龍門口三秦記曰河津一名龍門水陸不通魚鼈之屬莫能上江海大魚集龍門下數十不得上上則為龍故曰曝腮龍門水經注曰其魚出鰓縣鰓六每三月則上渡龍門得渡為龍否則點額而還此漢河積石

至于龍門之所經也 蔡傳李復云同州韓城北
有安國嶺東西四十餘里東臨大河瀕河有禹廟
在山斷河出處禹鑿龍門起於唐張仁愿所築東
受降城之東自北而南至此山盡兩岸石壁峭立
大河盤束於山峽間千數百里至此山開岸濶豁
然奔放怒氣噴風聲如萬雷余按舊說禹鑿龍門
而不詳其所以鑿誦說相傳但謂因舊修闢去其
齟齬以決水勢而已今詳此說則謂受降以東至

于龍門皆是禹新開鑿若果如此則禹未鑿時河之故道不知却在何處而李氏之極博不知此說又何所考也德清胡渭曰按安國傳言禹治河或鑿山或穿地以通流此亦有所本鑿山即闢龍門穿地即鑿呂梁也但不當云起自積石耳穎達復為之說曰釋水云河千里一曲一直則河從積石北行又東乃南行至龍門計應三千餘里龍門底柱鑿山也其餘平地穿地也言自龍門以下亦然

則其所穿鑿更遠矣李復謂起自東受降城較安國所言為近然計東城至安國嶺亦有十四五百里如必須處處穿鑿豈人力所能及禹勞民亦不應至此而二孔之妄又無論矣總由以導為施功遂積誤相承而不覺耳至其所謂鑿山穿地者亦只是因舊修闢非本無水道而始開之蔡氏云云則又疑所不當疑也禹導自積石為中國河其水不復行戎翟之境及三代之季雍州西北二隅

每為戎翟所侵秦漢以來屢復屢失大抵河湟之外悉屬羌渾雲中五原盡歸獯鬻河行其間出且入者再唐之中葉吐蕃強盛盜有隴西州縣遠近有司不復傳宰相賈耽乃繪布隴右山南九州具載河所經受為圖曰吐蕃黃河錄正元十四年上之其繫之吐蕃者蓋本中國河行之地而時為吐蕃所據故詳著之非謂河源之在積石外者也宋世亦陷吐蕃及西夏元乃混一罔不賓服明仍以

河州為入塞之始而天順六年元裔摩囉歡等入
居河套羈縻不絕以迄於今漢雲中五原二郡之地
遂不登版圖黃河之行其境者世將不知為弼成
之所及而州縣舊跡置之不問矣故余解導河於
大積石以下黃甫川以上備考古記叙次特詳
遼史龍門山石壁對峙高數百尺望之若門徼外
諸河及沙漠潦水皆於此趨海雨則俄頃水逾千
仞晴則清淺可涉

太平寰宇記龍門山北有河口略似龍門而不能
通相傳鯀所鑿績用弗成今名錯開河

又南出龍門口汾水從東來注之

汾水出太原汾陽縣管涔山西南流至汾

陰縣北而西注于河詳後汾水篇

昔者大禹導河積石踈決梁山謂斯處也即經所謂
龍門矣魏土地記曰梁山北有龍門山大禹所鑿通
孟津河口廣八十步巖際鐫跡遺功尚存岸上并有
祠廟祠前有石碑三所二碑文字素滅不可復識一

碑是太和中立竹書紀年晉昭公元年河赤于龍門

三

按竹書紀年河下尚有一水字

梁惠成王四年河水赤于龍門

三日京房易妖占曰河水赤下民恨

河水又南右合暢谷水

水自溪東南流逕夏陽縣西北東南注于河

夏陽漢屬左馮

翊故少梁惠文王十一年更名即今韓城縣地

河水又南逕梁山原東

原自

朱本作自原

山東南出至河晉之望也在馮翊夏陽

縣之西臨于河上山崩壅河三日不流晉侯以此問

伯宗即是處也春秋穀梁傳曰成五年梁山崩遏河

水三日不流召伯尊

伯宗伯尊同是一人聲相轉耳

遇輦者不避使

車右鞭之

註凡車將在左御在中有力之人在右所以脩非常也

輦者曰所以

鞭我者其取道遠矣伯尊因問之輦者曰君親編素

率羣臣哭之斯流矣如其言而河流

河水又南岨谷水注之

水出縣西北梁山東南流橫溪注之水出于三累山

其山層密三成故俗以三累名山按爾雅山三成為崑丘斯山豈亦崑丘乎山下水際有二石室蓋隱者之故居矣細水東流至于峒谷側谿山南有石室西面有兩石室北面有二石室皆因阿結牖連局接闔所謂石室相距也東箱

朱本作廂

石上猶傳杵臼之跡庭

中亦有舊宇處尚髣髴前基北坎室上有微涓石溜豐周瓢飲似是栖遊隱學之所昔子夏教西河疑即此也而無辨之溪水又東南逕夏陽縣故城北故少

梁也秦惠文王十一年更從今名矣王莽之冀亭也

其水東南流

疑脫注字

于河昔韓信之襲魏王豹也以木

罌自此渡

史記淮陰侯傳信乃益為疑兵陳船欲渡臨晉而伏兵從夏陽以木罌執渡軍襲安

邑魏王豹驚引兵迎信信遂虜豹

河水又南右合陶渠水

水北西北梁山東南流逕漢陽太守殷濟精廬尚

謝云

宋本作尚在此脫一在字耳吳本改作精廬南似誤炳巽按上下文氣若作尚在則與上逕字不接作南勝似較俗謂之子夏廟河水又南逕高門南蓋層阜墮

缺故流東門之稱矣

此句疑有譌誤

又東南逕華池南池方

三百六十步在夏陽城西北四里許故司馬遷碑文

云高門華池在茲夏陽西城北漢陽太守殷濟精舍

四里所今高門東去華池三里溪水又東南逕夏陽

縣故城南服虔曰夏陽號邑也

朱云春秋僖公二年虞師晉師滅下陽杜

元凱云下陽號邑在河東大陽縣按漢志弘農陝縣注故號國在大陽馮翊夏陽縣注故少梁龍門在北

則下陽夏陽自屬兩地而公羊傳下陽作夏陽故服虔遂因之而誤也

在太陽東三十

里城南

太陽當作大陽按漢志大陽屬河東郡武王封太伯後于此是為虞公在大河之陽故名

又歷高陽宮北又東南逕司馬子長墓北墓前有廟
廟前有碑永嘉四年漢陽太守殷濟瞻仰遺文大其
功德遂建石室立碑樹柏何云柏隸釋作垣疑
是植字謂樹表也太史
公自叙曰遷生于龍門是其墳墟所在矣溪水東南
流入河昔魏文侯與吳起浮河而下美山河之固即
於此也

河水又南徐水注之

水出西北梁山東南流逕漢武帝登仙宮東東南流

絕疆

朱本作疆

梁石逕劉仲城北是漢祖兄劉仲之封邑

也故徐廣史記音義曰邵陽國名也

邵陽當是邵陽按史記高帝紀

代王劉仲棄國亡自歸雒陽廢以為合陽侯按漢志邵陽屬馮翊師古曰音合應邵曰在邵水之陽高

祖八年侯劉仲是也

是也原本譌作元年

其水東南逕子夏陵

北東入河

河水又南逕子夏石室

東南北有二石室臨側河岸即子夏廟室也

又南過汾陰縣西

今平陽府榮河縣北有汾陰故城

河水東際汾陰睢

縣睢縣疑當作睢丘蓋漢志無睢縣也

故城在睢側

漢高帝六年封周昌為侯國魏土地記曰河東郡北

八十里有汾陰城北去汾水三里城西北隅曰睢丘

上有后土祠封禪書曰元鼎四年始立后土祠於汾

陰睢丘是也又有萬歲宮漢宣帝神爵元年幸萬歲

宮東濟大河而神魚舞水矣昔趙簡子沈欒澍於此

曰吾好聲色而是子致之吾好士六年不進一人是

過而黜吾善君子以為能譴矣

按呂氏春秋云趙簡子沈欒澍于河曰吾

好聲色矣而鸞徽致之吾嘗好良馬善御矣而鸞徽來之今吾好士六年而鸞未嘗進一人也是長吾過而絀善也云云則鸞激當作鸞徽是過而點吾善句亦誤

河水又逕郃陽城東

今西安府郃陽縣東四十里有郃陽故城

周威烈王之十七年魏文侯伐秦至鄭還築汾陰郃陽即此城也故有華邑矣為太姒之國詩云在郃之陽在渭之涘又曰纘女維莘長子維行謂此也城北有北漢水南去二水各數里其水東逕其城內東入于河又于城南側中有漢水東南出城注于河城南

又有漢水東流東注于河水南猶有文母廟前有碑

去城一十五里水即郃水也縣取名焉故應劭曰在

郃水之陽也河水又南漢水入焉水出汾陰縣南四

十里西去河三里平地開源瀆泉上湧大幾如輪深

則不測俗呼之為漢魁

郭璞爾雅注云河東汾陰縣有水口如車輪許瀆沸湧出

其深無限名之曰漢馮翊郃陽縣復有漢亦如之相去數里而夾河河中渚上又有一漢漢源皆潛相通

在汾陰者人壅其流以為陂種稻呼其本出為漢魁

古人壅其流以為陂水種

稻東西二百步南北一百餘步與郃陽漢水夾河中

渚上又有一漢水皆相潜通故呂忱曰爾雅異出同

流為漢水其水西南流厯朔

朱本孫云當作蒲

坂西西流注

于河

河水又南逕陶城西

元和志陶城在臨晉縣北四十里即今平陽府臨晉縣

舜陶河濱皇甫士安以為定陶不在此也然陶城在

蒲坂城北城即舜所都也南去厯山不遠或耕或陶

所在則可何必定陶方得為陶也舜之陶也斯或一

焉孟津有陶河之稱蓋從此始之南對蒲津關汲冢

竹書紀年魏襄王七年秦王來見于蒲坂閼四月越

王使公師隅來獻乘舟始罔

何云始罔似是舟名

及舟三百箭

五百萬犀角象齒焉

按竹書紀年作越王使公師隅來獻舟三百箭五百萬及犀角

象齒無乘舟始罔

及五字疑是衍

又南過蒲坂縣西

今蒲州東南有蒲坂故城

地理志曰縣故蒲也王莽更名蒲城應劭曰秦始皇

東巡見有長坂故加坂也孟康曰晉文公以賂秦秦

人還蒲於魏魏人喜曰蒲反矣故曰蒲反也薛瓚注

漢書云秦世家以垣為蒲反然則本非蒲也皇甫謐
曰舜所都也或言蒲坂或言平陽及漢者也今城中
有舜廟魏秦州刺史治太平遷都罷州置河東郡郡
多流離謂之徙民民有姓劉名墮者宿擅工釀採挹
河流醞成芳酎懸食同枯枝之年排於桑落之辰故
酒得其名矣朱云懸食二語字有譌脫按洛陽伽藍記云河東人劉白墮善釀酒六月中以甕貯酒曝日中經旬酒味不動飲之香美朝貴千里相餉命曰鶴觴齊民要術云十月桑落初凍則收水釀者為上時春酒正月然香醕之色清白若漿焉晦日收水為中時春酒

別調氛氲不與他同蘭薰麝越自成馨逸方土之貢
選最佳酌矣自王公庶友牽拂相招者每云索郎有
顧思同旅語索郎反語為桑落也更為籍徵之雋句
中書之英談郡南有厯山也謂之厯觀舜所耕處也
有舜井媯汭二水出焉南曰媯水北曰汭水迺疑是西
逕厯山下上有舜廟周處風土記曰舊說舜葬上虞
又記云耕於厯山而始寧剡二縣界上舜所耕田於
山下多柞樹吳越之間名柞為樵故曰厯山余按周

處此志為不近情傳疑則可證實非矣安可假木異

名附山殊稱彊引大舜即比寧懷

朱云寧字誤當作寧括地志云河內

郡獲嘉縣有寧城而懷縣亦屬河內又媯州懷戎縣西有舜井路史國名記云陽處父聘衛過寧一作寧

則寧懷並地名矣

更為失誌記之本體差實錄之常經矣

山媯汭言是則安於彼垂矣尚書所謂釐降二女于

媯汭也孔安國曰居媯水之內王肅曰媯汭虞地名

皇甫謐曰納二女於媯水之汭馬季長曰水所出曰

汭然則汭似非水名而今見有二水異源同歸渾流

西注入于河

河水又南逕雷首山西

山臨大河北去蒲坂三十里尚書所謂壺口雷首者俗亦謂之堯山山上有故城世又曰堯城閼駟曰蒲坂堯都按地理志曰縣有堯山有祠雷首山在南事有似而非非而是千載眇邈非所詳耳

又南凍水注之

水出河北縣雷首山縣北與蒲坂分山有夷齊廟閼

駟十三州志曰山一名獨頭山夷齊所隱也山南有古冢陵柏蔚然攢茂丘阜俗謂之夷齊墓其水也西南流亦曰雷水穆天子傳曰壬戌天子至于雷首犬

戎

按傳戎下有胡字

觴天子

按傳子下有于字

雷首之阿乃獻良馬

四

按傳下脫六字

天子使孔牙受之于雷水之于是也昔趙

盾田首山食祁彌明

左傳作提彌明

翳桑之下即於此也洩

水又西南流注于河春秋左傳謂之洩川者也俗謂之陽安澗水

又南至華陰潼關渭水從西來注之

華陰縣今屬陝西
西安府潼關在華

陰縣東四十里元和志云關
西一里有潼水因以名關

汲都

當是汲郡
或是汲冢

竹書紀年曰晉惠公十五年

五字誤
有說見

後凍
水篇

秦穆公率師送公子重耳涉自河曲春秋左氏

僖公二十四年秦伯納之及河子犯以璧授公子曰

臣員羈紲從君巡于天下臣之罪多矣臣猶知之而

況君子請由此亡公子曰所不與舅氏同心者有如

白水授璧於此

授當作投按左傳云有
如白水授其璧於河

子推哭曰天

開公子子犯以為功吾不忍與同位遂逃焉

河水厯船司空與渭水會

船司空縣名漢地理志屬京兆尹今華陰縣東北五十里

有船司空故城

漢書地理志曰舊京兆郡之屬縣也左丘明國語云

華嶽本一山當河河水過而曲行河神巨靈手盪脚

蹋開而為兩今掌足之跡仍存華巖

朱箋云按巨靈事在薛綜西京

賦注引古語云非出左氏國語此殆誤記耳

開山圖曰有巨靈胡者偏得

神元之道能造山川出河所謂巨靈鼎首冠靈山

者也

張華西京賦巨靈鼎願註鼎願作力之貌左思吳都賦巨鰲鼎負首冠靈山註鼎負用力壯貌

又類篇鼎願鰲也一曰雌鰲為鼎本草鼎願大龜好負重或名虬蜺今石碑下龜趺象其形常有

好事之人故升華嶽而觀厥跡焉自下廟厯

朱本厯下有一

列字柏南行十一里東迴三里至中祠又西南出五里

至南祠謂之北君祠諸欲升山者至此皆祈請焉從

此南入谷七里又居一祠謂之石養父母石龕木主

存焉入

疑是又

南出一里至天井井裁容人穴空迂迴

傾曲而上可高六丈餘山上又有微涓細水流入井

中亦不甚沾人上者皆所由涉更無別路欲出井望
空視明如在室窺窻也出井東南行二里峻坂斗上
斗下降此坂二里許又復東上百丈崖升降皆湏攀
繩挽葛而行矣南上四里路到石壁緣傍稍進逕一
百餘步自此西南出六里又至一神名曰胡趨寺

朱箋

云神當作祠按郭緣生述征記西南出六里又至一祠名胡越寺神

神像有童子之容

從祠厯夾嶺裁廣三尺餘兩廂

朱云按宋本廂下有懸字

崖數萬

仞窺不見底祀祠有感則雲與之平也

朱云宋本無也字

然

後敢度猶須騎嶺抽身漸以就進故世謂斯嶺為擗
嶺矣度此二里便居山頂上方七里靈泉二所一名
蒲池西流注于澗一名太上泉東注澗下上宮神廟
近東北隅其中塞實雜物事難詳載自上宮東北出
四百五十步有屈嶺東南望巨靈手跡惟見洪崖赤
壁而已都無山下上觀之分均矣朱云分均字有謬
誤蓋言山下上觀
似有掌足之跡及至上宮而望掌足處但見洪崖赤
壁而已無復分均之跡也唐文粹載王涯仙掌辨曰
華嶽首峯有五崖北壁破巖而列自下遠而望之偶
為掌形舊俗謂是巨靈之跡余往觀焉誕哉此說乎

河在關內南流潼激關山因謂之潼關灌水注之水
出松果之上北流逕通谷世亦謂之通谷水東北注
于河述征記所謂潼谷水者也或說因水以名地也

河水自潼關東北流水側有長坂謂之黃卷坂傍絕

澗涉此坂以升潼關所謂沂黃卷以濟潼矣

卷當作
朱引

潘岳西征賦云
滸黃卷以濟潼歷北出東

崱朱云按西都賦云左據
函谷二崱之阻則此當

作東
崱

通謂之函谷關也

函谷關在今河南
靈寶縣南十一里

遼岸天高

空谷幽深澗道之峽車不方軌號曰天嶮故西京賦

曰巖嶮周固衿帶易守所謂秦得百二并吞諸侯也

朱云二語見張載劍閣銘

是以王元說隗囂曰請以一丸泥東封

函谷關圖王不成其弊足霸矣

何云觀此則潼關函谷乃一地異名耳道

元北人不應誤也

郭緣生記曰漢末之亂魏武征韓遂馬超

連兵此地今際河之西有曹公壘道來

上下疑有誤字項本改來

作東似得

原上云李典營義熙十三年王師會據此壘西

征記曰汭路逶迤入函道六里舊城城周百餘步北

臨大河南對高山姚氏置關以守峽宋武王入長安

檀道濟王鎮惡或據山為營或平城結壘

十六國春秋作或平

地結壘

為大小七營

十六國春秋作七十營

濱帶河嶮姚氏亦保

據山原阜之上

按十六國春秋作泓亦保據山原陵阜之上各設營壘則此句原下當有

陵尚傳故迹矣

按宋書武帝紀晉安帝義熙十三年正月公以舟師進討姚泓二月冠軍

將軍檀道濟等次潼關三月庚辰大軍渡河索虜步騎十萬營據河津公命諸軍濟河擊破之公至洛陽

七月至陝城龍驤將軍王鎮惡伐木為舟自河浮渭八月扶風太守沈田子大破姚泓於藍田王鎮惡尅

長安生擒泓公至長安執送姚泓斬于建康市與此正同則此之宋武王當作宋公或王字疑衍竟作宋

武或王字當關之直北隔河有層阜巍然獨秀孤峙是帝字方妥

河陽世謂之風陵戴延之之所謂風埵者也

朱箋太平御覽

引戴延之西征記云伏羲女媧風姓也此當是女媧之墓九域志云女媧墓在今潼關口河灘上屹然介河有木數株雖暴漲不漂沒也寰宇記云河東縣三里風陵是女媧之墓南則河濱姚氏

之營與晉對岸

禹貢錐指曰以今輿地言之河自韓城縣龍門山

南流與汾水合

縣志云河自龍門而南距郃陽不百里河壩多客土遇潦輒潰又

南逕郃陽縣東其東岸則榮河縣臨晉縣

郃陽在陝西同

州東北一百十里黃河去縣四十里榮河在山西蒲州東北一百二十里黃河舊在縣西五里明時

漸徙而東正德二年遂至城下今去縣僅七十又步臨晉在州東北七十里黃河在縣西三十里

南逕朝邑縣東又南至華陰縣東北與渭水合其

東岸則蒲州

朝邑在同州東三十里黃河去縣二十八里有臨晉關華陰在華州東七

十里黃河去縣九十里蒲州在平陽府西南四百五十里黃河舊在州西蒲津門外明萬曆八年河決東齧城闢甃石岸以障之今漸徙而西去城十餘里有蒲津關與臨晉關夾河相對又南

逕雷首山西至潼關衛北

衛在陝西都司東明析華陰地置西至華陰縣

界一里黃河在衛北一里潼關故城在衛東南四里左傳所謂桃林之塞元和志云自靈寶縣以西至潼關折而東是為河曲春秋文公十二年秦晉戰于河曲即此地也

皆是

此河水南至華陰之所經所稱龍門西河者也

河水又東北玉澗水注之

水南出玉溪北流逕皇天原西周固記開山東首上
平博方可里餘三面壁立高千許仞漢世祭天於其
上名之為皇天原上有漢武帝思子臺又北逕閿鄉
城西郡國志曰弘農胡氏有閿鄉世謂之閿鄉水也
按後漢郡國志弘農郡湖縣有閿鄉則此云胡氏謠當作湖縣為是魏尚書僕射閿鄉
侯河東衛伯儒之故邑

魏志云衛覬字伯儒文帝時官尚書封陽吉亭侯明帝即

位進封閭鄉侯其水北流注于河

三百戶

閭音聞

河水又東逕閭鄉侯河

孫云當作城南

東與金鳩澗水合

水出南山北逕皇天原東述征記曰金節地名也

朱箋

圖經曰金節即漢書金鳩里戾太子死處在閭鄉縣東十里鳩澗西

桃林周武王克殷休牛之地矣西征賦曰咸徵名於

桃園者也晉太康地記曰桃林在閭鄉南谷中其水

入北河

孫云當是河北蓋謂河北縣也

注于河

又東過河北縣南

縣與湖縣分河蓼水出襄山蓼谷西南流於河

今河北山

西平陽府芮城縣湖縣
今河南河南府閿鄉縣

河水又東永樂澗水注之

水北出於薄山南流逕河北縣故城西故魏國也

今芮

城縣北有河北故城薄
山在縣北一十五里

晉獻公滅魏以封畢萬卜偃

曰魏大名也萬後其昌乎後乃縣之在河之北故曰
河北縣也今城南西二面竝去大河可二十餘里北
去首山一十許里處河山之間土地迫隘故魏風著

十畝之詩也城內有龍泉南流出城又南斷而不流

永樂溪水又南入于河余按中經即渠豬之水也太

史公封禪書稱華山以西名山七薄山有疑其一焉

薄山即襄

何校改
衰下同

山也徐廣曰蒲坂縣有襄山山海

經曰蒲山之首曰甘桑之山共水出焉

按山海經作
甘桑之山括

地志云蒲州河東縣雷首山一名中條山一名厯山
亦名首陽山亦名蒲山一名襄山亦名甘棠山亦名

豬山括地志又云薄山一名衰山正義曰色眉反一
名寸棘一名渠山一名雷首一名獨頭一名首陽一

名吳山一名條山在陝州芮縣城北十里此山西起
雷山東至東吳坂凡十名以州縣分之多在蒲州

而西流注于河東則渠豬之山渠豬之水出焉而南
流注于河如準封禪書二水無西南流河之理今診
蓼水川流所趣與共水相扶永樂溪水導源注于河

又與渠豬勢合蒲山統自

項本
作目

總稱亦與襄山不殊

故揚雄河東賦曰河靈攬踢掌華蹈襄

漢書揚雄傳
作河靈攬踢

爪華蹈哀蘇靈曰河靈巨靈也華華山也哀哀山也
掌據之足蹈之也踢音試郎反服虔曰踢音石奐反
師古曰攬踢驚動之貌攬音攬踢二音並通爪古掌
字又史記封禪書薄山者襄山也徐廣曰蒲阪縣有
襄山或字誤則襄
與襄原可通用注云襄山在潼關北十餘里以是

推之知襄山在蒲阪蓼水即渠豬之水也

河水自河北城南東逕芮城

二城之中有段干木冢干木晉之賢人也魏文侯過其門軾其廬所謂德尊萬古芳越來今矣汲冢竹書紀年曰晉武公元年尚一軍芮人乘京荀人董伯皆叛匪直大荔故芮也此亦有焉紀年又云晉武公七年芮伯萬之母姜逐萬萬出奔魏八年周師虢師圖魏

今紀年作王師秦師圍魏

取芮伯萬而東之九年戎人逆芮

伯萬于邾

今紀年作邾

斯城亦或伯萬之故畫也

朱云畫字誤疑

是疆字譚元春云畫即界域之意恐非誤按今萬城縣北有河北故城唐貞觀十一年河溢壞陝州河

北縣即北

河水又會槃澗

明統志云槃澗水在陝州廢湖城西二十五里源出秦山北流入于河

水出湖縣夸父山北逕漢武帝思子宮歸來望子臺

東又北流入于河

夸父山在今閿鄉縣東南二十五里

河水又東逕湖縣故城北

湖縣故城在今閿鄉縣東四十里

昔范叔入關遇穰侯於此矣湖水出桃林塞之夸父

山廣員三百仞武王伐紂天下既定王及嶽濱

朱云當作

王巡嶽濱周頌時邁所謂及河喬嶽是也

放馬華陽散牛桃林即此處也

其中多野馬造父於此得驂騑綠耳盜驪之乘以獻

周穆王使之馭以見西王母湖水又北逕湖縣東而

北流入于河魏土地記曰弘農湖縣有軒轅黃帝登

仙處黃帝採首山之銅鑄鼎於荆山之下有龍垂胡

于鼎黃帝登龍從龍者七十人遂昇於天故名其地

為鼎湖荆山在馮翊首山在蒲阪與湖縣相連晉書

地道記太康記並言胡縣也漢武帝改作湖俗云黃
帝自此乘龍上天也地理志曰京兆湖縣有周天子
祠二所故曰湖不言黃帝升龍也山海經曰西九十
里曰夸父之山其木多欒栲多竹箭其陽多玉其陰
多鐵其北有林焉名曰桃林其中多馬湖水出焉北
流注于河故三秦記曰桃林塞在長安東四百里若
有軍馬經過好行則牧華山休息林下惡行則決河
漫延人馬不得過矣

河水又東合柏谷水

水出弘農縣兩石隄山山下有石隄祠銘云魏甘露
四年散騎常侍征南將軍豫州刺史領弘農太守南
平公之所經建也其水北流逕其亭下晉公子重耳
出亡及柏谷卜適齊楚狐偃曰不如之翟漢武帝嘗
微行此亭見饋亭長妻故潘岳西征賦曰長徵客於
柏谷今西征賦作長
微賓於柏谷妻靚貌而獻餐謂此亭也谷水
又北流入於河

河水又東右合門水

按門水在今河南府靈寶縣西南

門水即洛水之枝流者也洛水自上洛縣東北於拒城之西北分為二水枝渠東北出為門水也門水又東北厯陽華之山即華陽山海經所謂陽華之山門水出焉者也又東北厯峽謂之鴻關水東有城即關亭也水西有堡謂之鴻關島世亦謂之劉項裂城處非也余按上洛有鴻臚園池是水津渠浚注故謂斯川為鴻臚澗鴻關之名乃起是矣門水又東北厯邑

川燭水注之左水出於陽華之陽東北流逕盛牆亭
西東北流與右水合右水出陽華之陰東北流逕盛
牆亭東北與左水合即山海經所謂緒姑之水出於
陽華之陰東北流注于門水者也

按山海經陽華之
山緒姑之水出于

其陰而東流注于門水緒
音藉則緒姑當作緒姑

又東北燭水注之水有二

源左水出於衡嶺世謂之石城山其水東北流逕石
城西東北合右水右水出石城山東北逕石城東東
北入左水地理志曰燭水出衡嶺下谷開山圖曰衡

山在函谷山西南是水亂流東注于緒姑亦當作之

水二水悉得通稱矣厯澗東北出謂之開方口水側

有阜名之方伯堆

之字疑衍

宋奮武將軍魯方平建武將

軍薛安都等與建威將軍柳元景北入軍次方伯堆

者也堆上有城即方伯所築也

朱箋宋書柳元景傳元嘉二十七年大舉

北討遣奮武將軍魯方平建武將軍薛安都略陽太守龐法起入盧氏加元景建威將軍總統羣帥法起等度鐵嶺山次開方口元景以軍食不足難可曠日持久乃束馬懸車引軍上百丈崖由溫谷以入盧氏法起諸軍進次方伯阜去弘農城五里元景引軍度熊耳山安都頓軍弘農法起進據潼關又東

北逕入川城南

謝云宋本作逕邑川城南

即漢封竇門之故邑川

受其名亦曰竇門城在函谷關南七里又東北田渠

川水注之出衡山之白石谷東北流逕故丘亭東是

薛安都軍所從城也其水又逕鹿蹄山西山石之上

有鹿蹄自然成者非人功所刊

鹿蹄山在今河南宜陽縣

厯田渠

川謂之田渠水西北流注于燭水燭水又北入門水

水之左右即函谷山也門水又北逕弘農縣故城東

城即故函谷關校尉舊治處也終軍棄繻於此

漢書終軍

傳初軍從濟南當詣博士步入關關吏子軍繻軍門以此何為吏曰為復傳還當以合符軍曰大丈夫西游終不復傳還棄繻而去注曰繻音須繻符也書帛裂而分之若券契矣復返也謂返時出關更以為傳

也燕丹孟嘗亦義動鷄鳴於其下

義字疑誤燕丹子曰丹去秦夜到關

關門未開丹為鷄鳴衆鷄皆鳴遂得逃歸與孟嘗君事相類

可謂深心有感志誠

難奪矣昔老子西入關尹喜望氣於此也故趙至與

嵇茂齊書曰李叟入秦及關而嘆亦言與嵇叔夜書

及關尹望氣之所異說紛綸並未知所定矣漢武帝

元鼎四年徙關於新安縣

漢書武帝本紀元鼎三年冬徙函谷關於新安此云

四年以故關為弘農縣弘農郡治王莽改為右隊劉

桓公為郡虎相隨渡河光武聞而善之

後漢書儒林傳劉昆字桓

公光武時為弘農太守先是崤澠驛道多虎災行旅不通昆為政三年仁化大行虎皆負子渡河帝聞而異之後徵為光祿勳詔問昆曰前在江陵返風滅火後守弘農虎北渡河行何德政而致是事昆對曰偶然耳左右皆笑其質訥帝曰此乃長者之言也

其水側城北流而注于河

水於此有洹津之名

朱云詳下文當作洹津

說者咸引漢武微

行柏谷遇辱竇門又感其妻深識之饋既返王階厚

賞賚焉賜以河津令其驚渡今竇津者也故潘岳西

征賦酬匹婦其已泰胡厥夫之謬官

文選注云漢武帝為微行嘗至

柏谷夜宿逆旅翁惡少年十餘人皆持弓矢刀劍令主人姬出遇客婦謂其翁曰吾觀此丈夫非常人也且有偏不可圖也天寒姬酌酒多與其丈夫醉姬自縛其夫諸少年皆走姬出謝客殺鷄作食平旦上去還宮乃召逆旅夫妻見之賜姬金千斤擢其夫為羽林郎言酬其婦已過又官其夫則謬矣故曰謬官

袁豹之徒並以為然余按河之南岸夾側水濱有測

一作澗謂之涇津河北縣有涇水涇津其水南入於

河河水故有涇津之名不從門始蓋事類名同故作

者是之竹書穆天子傳曰天子自賓軫乃次于涇水

之陽丁亥入于南鄭考其沿厯所鍾路直斯津以是
推之知非因門矣俗或謂之偃鄉澗水也河水又在
朱本左右一水其水三源疏引俱導薄山南流會成

作有

一川其三水之內世謂之閑原言虞芮所爭之田所
未詳矣又南注于河河水右會水注之水出南山北
逕曹陽亭西陳涉遣周章入秦少府章邯斬之于此
魏氏以為好陽晉書地道記曰亭在弘農縣東十三
里其水西北流入於河河水又東蓄水注之

明一統志蓄水

在靈寶縣

東十里

水出常丞

按山海經當作參下同

之山西北逕曲沃

城南又屈逕其城西北入河諸注述者咸言曲沃在北此非也魏司徒崔浩以為曲沃地名也余按春秋文公十三年晉侯使詹嘉守桃林之塞處此以備秦時以曲沃之官守之故曲沃之名遂為積古之傳矣河水又東得七里澗澗在陝西

在陝縣之西今為陝州水為石橋溝

在州西七里

故因名焉谷水自南山通河亦謂之曹

陽坑是以滿岳西征賦曰行於漫瀆之口憇於曹陽

之墟桓豹崔浩亦不非其地矣余按漢書昔獻帝東
遷逼以寇難李傕郭汜追戰于弘農澗天子遂露次
曹陽楊奉董承外與傕和內引白波帥李樂等破傕
乘輿於是得進復來戰奉等大敗兵相連綴四十餘
里方得達陝以是推之似非曹陽然以山海經求之

菑曹字相類是或有曹陽之名也

元和志曹陽墟俗名七里澗在陝縣

西南七里黃河自靈寶界流入後漢獻帝東歸至陝
議者欲天子浮河東下太尉楊彪曰從此以東有三
十六灘非萬乘
所當從也乃止河水東合譙譙水蕞源常丞之山

明一

統志 灃水在陝州城南三里
湧出入河俗呼為三里澗
俗謂之于山蓋先後之

異名也山在陝城南八十里其川流也二源雙導同

注一壑而西北流注于河

又東過陝縣北

橐水出橐山西北流

明一統志橐水在陝州城南一名永定澗水漫流故又名漫澗

又有于水出南山北合逕崖峽北流與于山之水會

出于山東谷兩川合注于崖水又東北注橐水北流

出谷謂之漫澗矣與安陽溪水合水出石峭南西逕

安陽城南漢武帝封上官桀為侯國也潘岳所謂我

徂安陽也

秦縣漢省入蕩陰晉始置安陽縣今為河南彰德府治

東合漫澗水

北有逆旅亭謂之漫口客舍也

又西逕陝縣故城南

又合一水謂之瀆谷水南出近溪北流至橐其水又

西北逕陝城西西北入于河河北對茅城故茅亭茅

戎邑也公羊曰晉敗之大陽者也津亦取名焉春秋

文公三年秦伯伐晉自茅津濟封峭尸而還是也東

則咸陽澗水注之水出北虞山南至陝津注河河南
即陝城也昔周召分伯以此城為東西之別東城即
虢邑之上陽也虢仲之所都為南虢三虢此其一焉
其大城中有小城故焦國也武王以封神農之後于

此王莽更名黃眉矣

今河南府陝州治即陝縣故城
古焦國也虢山在州西北三里

戴延之云城南倚山原北臨黃河懸水百餘仞臨之
者咸悚惕焉西北帶河水湧起方數十丈有物居水
中父老云銅翁仲所投處又云石虎載經終此沉沒

二物並存水所以湧所未詳也或云翁仲頭髻常出水之漲減恒與水齊晉軍當至髻不復出今惟見水異耳嗟嗟有聲聲聞數里按秦始皇二十一

按史記當是六

年長狄十二見於臨洮長五丈餘以為善祥鑄金人十二以象之各重二十四萬斤坐之宮門之前謂之金狄皆銘其胸云皇帝二十六年初并天下以為郡縣正法律同度量大人來見臨洮身長五丈足六尺李斯書也故衛恒叙篆曰秦之李斯號為工篆諸

山及銅人銘皆斯書也漢自阿房徙之未央

疑漏宮字前

俗謂之翁仲矣地皇二年王莽夢銅人泣惡之念銅人銘有皇帝初兼天下文使尚方工鑄滅所夢銅人膺文後董卓毀其九為錢具在者三魏明帝欲徙之洛陽重不可勝至霸水停之漢晉春秋曰或言金狄泣故留之石虎取置鄴宮苻堅又徙之長安毀二為錢其一未至而苻堅亂百姓推置陝北河中於是金狄滅除以為鴻河巨瀆故應不為細梗躡湍流長津

碩浪無宜以微物屯流斯水之所以濤波者蓋史記所云魏文侯二十六年號山崩壅河所致耳獻帝東遷自夕潛渡墜坑爭舟舟指可掬亦是處矣

又東過大陽縣南

交澗水出吳山東南流入河河水又東路澗水亦吳

山東逕大陽城西南流注水入于河

此條疑有脫誤

河水又東逕大陽縣故城南

竹書紀年曰晉獻公十有九年獻公會虞師伐虢滅

下陽虢公醜奔衛獻公命瑕父呂甥邑於虢都地理志曰北虢也有天子廟王莽更名勤田應劭地理風俗記城南大河之陽也

河水又東沙澗水注之

北出虞山東南逕傳巖厯傳說隱室前俗名之為聖人窟孔安國傳傳說隱於虞虢之間即此處也傳巖東北十餘里即巔軫坂也春秋左傳所謂入自巔軫者也有東西絕澗左右幽空窮深地壑中則築以成

道指南北之路謂之為幹橋也傳說傭隱止息於此
高宗求夢得之是矣橋之東北有虞原上道東有虞
城堯妻舜以嬪於虞者也周武王以封太伯弟虞仲
於此是為虞公太原地記所謂北虞也城東有山世
謂之五家冢冢上有虞公廟春秋穀梁傳曰晉獻公
將伐虢荀息曰君何不以屈產之乘垂棘之璧假道
於虞公曰此晉國之寶也曰是取中府置外府也公
從之及取虢滅虞乃牽馬操璧璧則猶故馬齒長矣

即宮之奇所以謂虞虢其猶輔車相依唇亡則齒寒

虢亡虞亦亡矣其城北對長坂二十許里謂之虞坂

戴延之曰自上及下七山相重戰國策曰昔騏驎駕

鹽車上於虞坂遷延負轅而不能進此蓋其困處也

橋水水字疑衍東北山溪中有小水西南流沙澗亂流逕

太疑當作大陽城東河北郡治也澗水南流逕注于河河

水又東右左一本左下尚有右字上右字疑是衍文當是左右合積石土柱二

溪並北發大陽之山南流入於河是山也亦通謂之

薄山矣故穆天子傳曰天子自監

按山海經注云監鹽池今在河東解

縣監音古

已丑南登于薄寘軫之隘乃宿于虞是也

又東過砥柱間

砥柱山名也昔禹治洪水山陵當水者鑿之故破山

以通河河水分流包山而過山見水中若柱然故曰

砥柱也三穿既決水流踈分指狀表目亦謂之三門

矣山在虢城東北太陽城東也

太當是大元和志云砥柱山俗名三門山

在破石縣東北五十里黃河中破石即陝縣地

搜神記稱齊景公渡于江沈

之河鼃銜左驂沒之衆皆惕古冶子於是拔劍從之
邪行五里逆行三里至于砥之下乃鼃也左手持鼃
頭右手挾左驂驚躍鵠踴而出仰天大呼水為逆流
三百步觀者以為河伯也亦或作江沅字者也若因
地而為名則宜在蜀及長沙按春秋此二土並景公
之所不至古冶子亦無因而騁其勇矣劉向叙晏子
春秋稱古冶子曰吾嘗濟于河鼃銜左驂以入砥柱
之流當是時也從而殺之視之乃鼃也不言江沅矣

又考史遷記云景公十二年公見晉平公十八年復見晉昭公旌軒所指路直斯津從黿砥柱事或在茲又云觀者以為河伯賢於江沅之證河伯本非江神又可知也

河之右則崦嵫水注之

崦嵫水在今河南府永寧縣北六十里

出河南盤崦山西北流水上有梁俗謂之鴨橋也歷

澗水東北流與石崦水合水出石崦山山有二陵南

陵夏后臯之墓也

左傳云臯墓在釁南陵而明統志河南府永寧縣崦山有孔甲陵蓋

誤以帝鼻為孔甲也北陵文王所避風雨也秦將襲鄭蹇叔致

諫而公辭焉蹇叔哭子曰吾見其出不見其入晉人禦師必于殽矣余收爾骨焉孟明果覆秦師於此崤水又北左右合西水亂流注于河

河水又東千崤之水注焉

水南導于千崤之山其水北流纏絡二道漢建安中曹公西討巴漢惡南路之嶮故更開北道自後行旅率多從之今山側附路有石銘云晉太康三年弘農

太守梁抑

元和志引此作梁柳按元晏春秋云梁柳是皇甫士安從姑之子也官城陽太守

修復舊道太嶠以東西嶠以西明非一嶠也西有二

石又南五六十步臨溪有恬漠先生翼神碑蓋隱斯

山也其水北流注于河河水翼岸夾山魏峯岐舉羣

山疊秀重嶺干霄鄭元按

禹貢錐指引此作鄭元云

地說河水東

流貫砥柱觸闕流今世所謂砥柱者蓋乃闕流也砥

柱當在西河未詳也余按鄭元所說非自

當作是

西河

當無山以礙

胡引此作擬之

之自砥柱以下五戶以上其間

一百二十里河水竦石桀出勢連襄陸蓋亦禹鑿以
通河疑此閼流也其山雖闢尚梗湍流激石雲洄濺
波怒溢合有一十九灘水流迅急勢同三峽破害舟
船自古所患漢鴻嘉四年楊焉言從河上下患砥柱
隘可鑿廣之上乃令焉鑿之裁沒水中不能復去而
令水益湍怒害甚平日魏景初二年二月帝遣都督
沙丘部監運諫議大夫寇茲帥衆五千人歲常修治
平河岨晉泰始三年正月武帝遣監運太中大夫趙

國都匠中郎將河東樂

樂疑是

世帥衆五千餘人修治

河灘事見五戶祠銘雖世代加功水流湍湑濤波尚
屯及其商舟是次鮮不踟躕難濟故有衆峽諸灘之
言五戶灘名也有神祠通謂之五戶將軍亦不知所
以也

宋林之奇云河自西華陰遂折而東流以至底柱
亦謂之三門山山在虢城東北大陽城東也案道
元謂砥柱是禹之所鑿其說是也至謂破山以通

河此則過論河之至砥柱蓋舊有可通之道禹嫌其狹於是疏而廣之故有三門非是先鑿砥柱山以為三門然後導河而過之也漢鴻嘉中楊焉上言砥柱狹隘可鑄廣之夫禹之治水未嘗不為萬世之慮使砥柱尚有可鑄之理則禹鑄之矣禹所不能鑄而焉欲鑄之何其不思之甚也蓋河自龍門至於華陰東折以及砥柱夾於兩山之間其勢最為狹隘故古語云龍門之下河水駛于竹箭惟

其為高山所束其勢不得不盤還則其漂悍湍激
覆溺舟船是乃萬世之患也豈人力之所能勝哉
酈元謂水流峻急勢同三峽破壞舟船自古所患
此說是也頃歲建劔大興工役鑿治衆灘其費不
貲某嘗詢於舟人云灘患不減于昔日以是知天
地山川之險蓋有出於勢之自然者未易以人力
爭也砥柱舟船之患雖禹無如之何而況於楊焉
輩乎

鄭曉古言云河不能決于砥柱之上者河由兩山中行也出砥柱則平原廣野又并受關東諸山之水水流益多水勢益大地形益卑水勢益急虞夏以前皆都在底柱之上商初都亳亦在諸山中書所謂適於山降凶德是也以後就水利反受其害以故殷數遷都至周之哀井田漸廢侯國爭水利者築隄以包沃饒之利避水患者亦築隄以鄰國為壑隄日多水日東日失其性而致怒決溢之害

不小然決而南奪淮而行害郡邑為少決而北則無復九河故道原野被害遠矣以今輿地言之

河自潼關衛北折而東逕閿鄉縣北又東逕靈寶

縣北其北岸則為城縣

閿鄉在河南陝州西少北一百三十里黃河南去縣

七里靈寶在州西六十里黃河南去縣十里芮城在山西解州西南七十里黃河在縣南二十里芮伯萬之故疆也蓋芮城與閿鄉分河俱在河之北岸薄山在縣北十五里又東逕陝州

北其北岸則平陸縣又東過砥柱

陝州在河南府西三百里平陸

在解州東南九十里底柱在黃河中西去陝州四十里西北去平陸五十里

此河水東

至砥柱之所經也 唐趙冬曦三門賦序曰砥柱
山之六峰者皆生河之中流蓋夏后之所開鑿其
最北有兩柱相對距崖而立即所謂三門也次於
其南有孤峰揭起峰頂平濶夏禹之廟在焉西有
孤石數丈圓如削成復次其南有三峰東曰金門
中曰三堆西曰天柱河水從黃老神前東流湍激
蹙於蝦石折流而南漱于三門苞于廟山乃分為
四流淙於三峰之下抵以曲隈會流東注加以兩

崖夾水盤紆激射天下罕比 明都穆曰砥柱在
陝州東五十里黃河之中循河至三門集津三門
者中曰神門南曰鬼門北曰人門水行其間聲激
如雷而鬼門尤為險惡舟筏一入鮮有得脫三門
之廣約二十丈其東百五十步即砥柱崇約三丈
周數丈蔡氏書傳以三門為砥柱州志亦謂砥柱
即三門山皆未嘗親履其地故謬誤若此德清胡
渭曰按此說與趙賦小異要之諸峰在當時總為

一巨石禹析之以通河三門亦砥柱也後人強生分別耳

又東過平陰縣北又東至鄧清水從西北來注之

清水出清廡山之西嶺世亦謂清營山其水東南流出峽峽左有城蓋古關防也清水厯其南東流逕臯

落城北服虔曰赤翟之都也世謂之倚毫當是毫城蓋

讀聲近傳因失實也春秋左傳所謂晉侯原本使太

子申生伐東山臯落氏者也與倚毫川水合水出北

山礦谷東南流注于清 清水又東逕清廉城南又
東南流又會南溪溪水出南山而東注清水又東合
棗澗水水出左人嶺下南流俗謂之扶蘇水又南厯
奸苗北馬頭山亦白水原西南逕垣縣故城北史記
魏武侯二年城安邑至垣即是縣也其水西南入清
水色白濁初會清流流注

朱箋家本無
流注二字

乃有元素之

異也清水又東南逕陽壺城東即垣縣之壺城東即
垣縣之壺丘亭晉遷宋五大夫所居也清水又東南

流注於河

今垣曲縣西有垣縣故城

河水又東與教水合

出垣縣北教山南逕輔山高三十許里上有泉不測

其深山頂周員五六里少草木山海經曰孟門東南

有平山水出于其上

水上漏平字

潛于其下又是王屋之

次疑即平山也其水南流歷鼓鍾上峽懸洪五丈飛

注流壑夾岸深高壁立直上經崖秀舉百有餘丈峯

次青松巖懸賴石於中厯落有翠柏生焉丹青綺分

望若圖繡矣水廣一十許步南流厯鼓鍾川分為二

澗一澗西北出一百六十許里山岫迴阻纔通馬步

今聞喜縣東北谷口猶有乾河里故溝存焉今無復

有水

按山海經王屋山東北三百里曰教山教水出焉是水冬乾而夏流實惟乾河注云今河東聞

喜縣東北有乾河里但有故溝處無復水即是也

一水厯治官西世人謂之

鼓鍾城城之左右猶有遺銅及銅錢也城西阜下有

大泉西流注澗與教水合伏入石下南至下峽山海

經曰鼓鍾之山帝臺之所以觴百神即是山也其水

重源雙發南至西馬頭山東載

謝云疑作截

坡下又伏流

南十餘里復出又謂伏流水南入于河山海經曰教

山教水出焉又南流注于河

今山海經作西流

是水冬乾夏

流實惟乾河也今世人猶謂之為乾澗矣

河水又與畛水合

水出新安縣青要山

新安縣今屬河南府青要山在縣西北二十里

今謂之

彊山山海經曰青要之山畛水

朱本有出焉二字

北流注于

河即是水也河水又東正回之水入焉水出驪山彊

當是疆下同

山東阜也東流俗謂之疆川水與石等瓜川

合出西北石澗中東南流注于疆水疆水又東逕疆

冶

原本謠作疆治從朱本改正

鐵官東東北流注于河

河水又東合庸庸之水

按山海經作瀟瀟

水出河南垣縣宜蘇山俗謂之長泉水山海經曰水

多黃貝伊洛門也其水北流分為二水一水北入河

一水又東北流注于河

河水又東逕平陰縣北

地理風俗記曰河南平陰縣故晉陰地陰戎之所居
又曰在平城之南故曰平陰也三老董公說高祖處
陸機所謂皤皤董叟謨我平陰者也

見漢高祖功臣頌

魏文

帝改曰江陰矣

今河南府孟津縣有平陰縣故城

河水西會清水

一作右會

水出垣縣王屋西山潞溪夾山東南流逕故城東即
潞關也漢光武建武二年遣司空王梁北守潞關天
井關擊赤眉別校皆降之獻帝自陝北渡安邑東出

濬關即是關也濬水西屈逕關城南歷軹關南逕苗
亭西亭故周之苗邑也又東流注于河經書清水井

也

此句有錯誤朱
云宋本作非也

是乃濬水耳



水經注集釋訂訛卷四